



古今法書日苑

五十七  
五十八

112  
49  
31









古今法書苑卷之五十七

吳郡王世貞元美甫編 雲間王乾昌伯元甫校

十三之石三

漢窆石銘 永建元年

元祐二年永城下得石如豐碑其上刻銘曰沛國臨  
淮時窆石室永建六年五月十五日大歲在未所造  
作大吉利時窆石室戾來歸我有之按永建漢順帝  
即位之元年辛未則謂太歲在未是也傳曰窆器豐  
碑之屬然古之制公室視豐碑三家視桓楹而周制  
反窆以度為丘隧共喪之窆器蓋豐碑謂斲大木為



碑形如石而窆爲橫木蓋豐碑之上所以下紼君封以衡大夫以咸衡以木橫之棺旁咸直以紼擊之鄭衆曰窆謂塋下棺也讀如祀祭之祀左傳謂之備檀弓謂之封嘗謂墓之有銘在漢則杜鄴甄豐皆樹之於外其後如繆襲輩刻官代納之壙中乃刻銘墓中不知起于何時云

廣川書跋

漢榮口石門碑

陽嘉三年

瀆水受河水有石門謂之榮口石門也而地形殊卑門南際河有故碑云惟陽嘉三年二月丁丑使河堤謁者王誨疏達河川述荒廢土立功府鄉規基經始

詔榮加令遷在沅州乃簡朱軒授使司馬登令續茂前緒稱遂休功云云使河堤謁者山東東昏司馬登字伯志代東萊典城王誨字孟堅河內郡太守向豺守伯尹丞汝南鄧方字德山懷令劉丞字季意河堤掾匠等造陳留浚儀邊詔字孝先頌

水經注

漢上東門石橋石柱銘

陽嘉四年

聲水逕建春門石橋下卽上東門也橋首建兩石柱橋之石柱銘云陽嘉四年乙酉壬申詔書以成下漕渠東通河濟南引江淮方貢委輸所田而至使中謁者魏郡清淵馬憲監作石橋梁柱敦勅工匠盡要妙

之巧攢立重石累高周距橋工路博流通萬里云云  
河南尹邳隗丞渤海重合雙水曹掾中牟任防史下  
蔭史趙興將作吏睢陽申翔道橋掾成畢卑國洛陽  
令江雙丞平陽逢監掾王騰之主石作左北平山仲  
三月起作八月畢水經注  
漢順帝修太學碑陽嘉九年  
石經東有一碑碑文云建武二十七年造太學年積  
毀壞永建六年九月詔書修大學刻石記年用作工  
徒十一萬二千人陽嘉九年八月作畢碑南面刻頌  
表裏鏤字猶存不破水經注

漢西嶽石闕銘永和元年

右漢西嶽石闕銘云永和元年五月癸丑朔六日戊  
午弘農太守常山元氏張勳為西嶽華山作石闕高  
二丈二尺其後為韻語文詞頗怪又字多假借時有  
難曉處永和漢順帝晉穆帝姚泓皆有此號穆帝時  
華陰不屬晉以此碑字畫驗之恐非姚泓時蓋漢刻  
也又按晉書載記姚興與泓傳本朝宋莒公記年通  
譜皆云泓以義熙十二年即偽位改元永和獨帝紀  
作十一年未知孰是因考永和年號并記之錄金石  
漢張平子碑永和四年

西鄂縣有平子墓墓之東側舊有平子碑文字悉是古文篆額是崔瑗之辭盛弘之郭仲產並云夏侯孝若爲郡簿復刊碑陰爲銘然碑陰二名乃是崔子玉及陳翕耳而非孝若悉是隸字二首並存又言墓次有二碑今惟見一碑

水經注

右漢張平子墓銘世傳崔子玉撰并書按范曄漢書張衡傳贊曰崔子玉謂衡數術窮天地制作侔造化此銘有之則真子玉作也其刻石爲二本一在南陽一在向城天聖中有右班殿直趙球者知南陽縣事因治縣署毀馬臺得一石有文驗之迺斯銘也遂龕

于廳事之壁其文至九百君子而止後半亾其在向城者今尚書屯田員外郎謝景初得其半於向城之野自九百君子已上則今以二本相補續文遂復完但闕其最後四字然則昔人爲二本者不爲無意矣據徐方回所記二十一字迺趙球所得南陽石之亾者今不獲見則又亾矣惜哉

集古錄

右漢張平子碑按後漢書列傳云平子永元中舉孝廉連辟公府不就安帝雅聞衡善術學公車特徵拜郎中而碑乃云舉孝廉爲尚書侍郎傳云再遷爲太史令而碑云一遷碑云遷公車司馬今遂相河間而

傳不載其爲公車司馬令傳云在河間三年上書乞骸骨徵拜尚書乃卒而碑不載其爲尚書此數事皆當以碑爲據惟傳云順帝初再徵爲太史令其事見平子所爲應間可信不疑而碑無之豈平子初嘗罷免後復拜此官而碑不書歟金石錄

右漢張平子殘碑政和中亾友劉斯立以此見寄云其石新得于南陽凡七十有二字今世所傳平子碑有兩本其一亡其首其一亡其尾以二本相補其文乃足此碑蓋後段之亾失者也字畫尤完好云金石錄

漢北海相景君銘漢安二年

右漢北海相景君銘其碑首題云漢故益州太守北海相景君銘其餘文字雖往往可讀而漫滅多不成文故君之名氏邑里官闕皆不可考其可見者云惟漢安二年北海相任城府君卒城下一字不可識當爲景也漢功臣景丹封櫟陽侯傳子尚尚傳子苞苞傳子臨以無嗣絕安帝永初中鄧太后詔封苞弟遽爲監亭侯以續丹後自是而後史不復書而他景氏亦無顯者漢安順帝年號也君卒于順帝時蓋與遽同時人也碑名有云不永慶壽余家集錄三代古器銘有云眉壽者皆爲慶蓋古字簡少通用至漢猶然



也集古錄

右漢北海相景君碑在濟州任城縣景氏在漢世爲任城人今有三碑尚存余皆得之此碑最完金石錄右北海相景君碑金石錄云在濟州任城縣蓋景氏在漢爲任城人也予按濟州卽今之濟寧州今碑乃在州學不知何年移置於此通志金石畧以不知其地故直云未詳姚江謝中舍大中近過濟寧榻以見惠予家自祖宗來藏碑頗富兼以予好收錄中間得於朋友之助者十常四五如此碑是也金石錄漢北海相景君碑陰

右漢景君碑陰後漢書百官志注河南尹官屬有循行一百三十人而晉書職官志州縣吏皆有循行今北碑陰載故吏都昌台丘暹而下十九人皆作脩行後漢及晉碑數有之亦與此碑陰所書同豈循脩字畫相類遂致訛謬邪碑陰又有故午營陵是遷等六人名姓莫知其爲何官又台丘不見午姓氏書惟見于此者兩人云金石錄

右景君碑陰列門下書佐及故吏等中有脩行凡十九人趙氏謂後漢書百官志注河南尹官屬有循行一百三十人而晉書百官志亦有脩行以爲循脩字

畫相類遂致譌予謂景君碑刻於漢而後漢書舊  
皆出傳錄則以脩為循者特傳錄之誤耳趙氏不信  
碑本而信漢書且復引晉書為證殊不知晉書修於  
唐其亦曰循行蓋乃漢書之誤而云然也金薤  
琳琅

漢尚書令虞詡碑建康

武平縣故城西南七里許有漢尚書令虞詡碑碑題  
云虞君之碑諱詡字定安為朝歌令武都太守文字  
多缺不可復尋按范曄漢書詡字升卿陳國武平人  
定安蓋其幼字也本經  
注

漢燉煌長史武班碑建和  
元年

右漢班碑者蓋其字畫殘滅不復成文其氏族州里  
官闕卒塋皆不可見其僅見者曰君諱班爾其首書  
云建元年太歲在丁亥而建下一字不可識以漢書  
考之後漢自光武至獻帝以建名元者七而桓帝建  
和元年歲在丁亥則此碑所缺一字當為和字一本  
無此  
六字乃建和元年也碑文鈇滅者十八九尤為可惜故  
錄之後得別本模榻粗明始辨其一二云武君誰班  
乃易去前本集古  
錄

右漢燉煌長史武班碑歐陽公集古錄云漢班碑者  
蓋其字畫殘滅不復成文其氏族官闕卒塋皆不可

見其可見者君諱班爾今以余家所藏本考之文字雖漫滅然猶歷歷可辨其額題云漢故燉煌長史武君之碑知其姓武而官為燉煌長史也碑云武君諱班字宣張昔殷王武丁克伐鬼方元功章炳勳藏王府官族析分因以為氏知其名字與氏族所出也又云永嘉元年卒知其卒之年月也金石錄

右漢燉煌長史武班碑歐陽公謂其字畫殘滅氏族州里官闕卒葬皆不可見趙氏謂以所藏本考之班官闕氏族與卒之年月皆歷歷可辨趙氏生歐公之後不應其本若是豈歐公者捐於當時而趙氏者得

之古搨邪予家本視趙氏雖若不逮然亦有可讀者

金薤琳瑯

漢武氏石闕銘

建和元年

右漢武氏石闕銘建和元年太歲在丁亥三月庚戌朔四月癸丑孝子武始公弟綏宗景興開明使石工孟季季弟卯造此闕直錢十五萬孫宗作師子直四萬開明子宣張仕濟陰年二十五曹府君察舉孝廉除燉煌長史被病云歿苗秀不遂嗚呼哀哉士女痛傷武氏有數墓在任城開明者仕為吳郡府丞綏宗名梁仕為郡從事宣張名班皆自有碑金石錄

漢中常侍費亭侯曹騰碑建和元年

右漢中常侍費亭侯曹騰碑文字磨滅其粗可見者云維建和元年七月二十二日己巳皇帝若曰其遣費亭侯之國其餘不可識也建和桓帝即位之元年也後三十七年獻帝中平元年騰養子操始為騎都尉領兵擊黃巾矣錄集古

右漢費亭侯曹騰碑云維建和元年七月二十二日己巳皇太后曰其遣費亭侯之國為漢輔藩而歐陽公集古錄乃言皇帝若曰其遣費亭侯之國誤也按後漢書建和元年桓帝即位梁太后臨朝稱制蓋此

碑所載遣騰之國詔書乃梁太后非桓帝也金石錄

漢太尉李固碑建和二年

長柳村漢李固墓碑銘尚存文字剥落不可復識水經注

漢司隸楊君碑建和二年

褒水歷小石門門穿山通道六丈有餘刻石言漢明帝永平中司隸校尉犍為楊厥之所開逮桓帝建和二一年漢大中大夫同郡王升嘉厥開鑿之功琢石頌德以為石牛道來攻本蜀論云秦惠王作五石牛蜀王令五丁引之成道厥蓋因而廣之云云水經注

右漢司隸校尉楊厥碑云惟ㄩ靈定位川澤攸同澤有所注川有所通余谷之川其澤南隆八方所達益城爲充高祖受命興於漢中道由子午塗路澀難更墮圍谷復定帝位以漢詆焉後以子午塗路澀難更墮圍谷復通堂光凡此四道坂高允難至於永平其有四年詔書開余鑿通石門中遭元二西夷虐殘橋梁斷絕子谷復循於是故司隸校尉犍爲武陽楊厥字孟文深執忠伉數上奏請廢子由斯得其度經至建和二年漢中太守王升字稚紀嘉君明知美其仁賢勒石頌德以明厥勲其辭大畧如此其刻畫尚完可讀大抵

述厥修復斜谷路爾但其用字簡省復多舛繆惟以ㄩ爲坤以余爲斜漢人皆爾獨詆字未詳焉永平明帝建和桓帝年號也

錄集古

右漢司隸楊厥開石門頌余嘗讀范曄後漢書鄧騭傳有云時遭元二之災人士饑荒章懷太子注以謂元二卽元元也古書字當再讀者卽於上字下爲小二字後人不曉遂讀爲元二岐州石鼓銘凡重言者皆爲二字明驗也

錄金石

漢吳郡丞武開明碑

右漢吳郡丞武開明碑云君字開明而其名已殘缺

又云永和二年舉孝廉除郎謁者漢安二年遷大長秋丞長樂太鄴丞永嘉元年喪母去官復拜郎中除吳郡府丞壽五十七建和二年十一月十六日遭疾卒其可見者如此其他磨滅不能盡讀按後漢書志大長秋長樂少府太僕官屬皆以宦者爲之而以史傳及漢魏石刻參考如大長秋少府之類皆雜用士人今武君以孝廉爲郎謁者郎中吳郡府丞皆非宦者之職是也

錄金古

漢漳河神壇碑和平元年

光武追銅馬於館陶大破之故關西號曰銅馬帝祠

取名焉廟側有碑述河內脩武縣張導字景明以建和三年爲鉅鹿太守漳津汎濫士不稼稽導披按地首與丞彭參掾馬道嵩等原其逆順揆其表裏修防排通正水路功蹟有成民用嘉賴題曰漳河神壇碑而俗老者儒猶謁斯廟爲銅馬劉神寺是碑頃因震裂餘半不可復識矣水經注

後漢張公廟碑和平元年

右漢張公廟碑在黎陽而碑無題首莫知爲何碑第時時得其字之可識而僅成者文曰惟和平元年正月丙寅和平桓帝年號以此知爲漢碑也又曰豐碑

廟堂之前又曰於穆張公則又知為張公廟碑矣又云國無災祲屢獲豐年作歌九章頌公德芳其辭有云公與守相駕蜚魚往來倏忽遠熹娛祐此兆民寧厥居其餘字畫尚完者甚多但不成文爾集古錄

漢祝長嚴訢碑

和平元年

右漢祝長嚴訢碑政和中下邳縣民耕地得之碑云惟漢中興金休烈和平元年歲治東宮星屬角房日建朱鳥中呂之均萬物慈射華澤青蔥跂行蠕動咸守厥常人物同授獨遭災霜顛實徂落壽不寬弘經設三命君獲其央年六十九又云伊歎嚴君諱訢

字少通兆自楚莊祖考相承招命道術治嚴氏春秋馮君章句又云幼為郡掾史會稽暨尉烏程毘陵餘暨章安山陰長以病去官後為丹陽陵陽丞守春穀長舉孝廉遷東牟侯相下邳祝長典牧十城所在若神其後有銘銘為五言頗殘缺難讀云金石錄

漢執金吾武榮碑

元嘉元年

右漢武榮碑云君諱榮字舍一本作舍和治魯詩經常君

章句孝經論語漢書史記左氏國語為州書佐郡曹

史一本作文學

主簿督郵五官掾功曹年三十六南蔡府

君察舉孝廉執金吾丞孝桓大憂屯守玄武闕加遇

害氣遭疾殞靈其餘文字殘缺不見其卒葬年月又不著氏族所出惟其碑首題云漢故執金吾丞武君之碑云

錄集古

右漢執金吾丞武榮碑歐陽公謂其文字殘缺不見卒葬年月及氏族所出予家本殘缺與歐公同而隸釋所載者則又往往可讀如云君卽吳郡府卿之子燉煌長史之次弟此乃其氏族之所出也但碑文簡短不書卒葬年月歐公待未之知耳

金薤琳瑯

漢從事武梁碑

元嘉元年

右漢從事武梁碑云故從事武掾掾諱梁字綏宗掾

休德忠孝岐嶷有異治韓詩闕憤傳講兼通河雒諸子傳記又云州郡請召辭疾不就安衡門之陋樂朝聞之義又云年七十四元嘉元年季夏三日遭疾隕靈其後有銘云懿德玄通幽目明兮隱居靖處休曜章今樂道忽榮垂蘭芳今身沒名存傳無疆今其他刻畫皆完可讀文多不盡錄碑在濟之在城余崇寧初嘗得此碑愛其完好後十餘年再得此本則缺其最後四字矣

錄金石

漢平都侯相蔣君碑

元嘉二年

右漢平都侯相蔣君碑文字殘缺其名字官闕皆不



可考惟其額題漢故平都侯相蔣君之碑而碑云年六十有五元嘉二年三月甲午卒爾有劉季孫景父者知名士與余先生有舊家藏金石刻千餘卷既歿其子不能保而一武人購得之其後余故人王備定觀復得數百卷其中漢碑數本余所未有者悉以見贈此其一也

金石錄

漢魯相置孔子廟卒史碑

元嘉三年

右漢魯相置孔子廟卒史碑云司徒臣雄司空臣戒稽首言魯前相瑛書言詔書崇聖道孔子作春秋制孝經演易繫辭經緯天地故特立廟褒成侯四時來

祠事已卽去碑有禮器無常人掌領請置百戶卒史一人典主守廟謹聞太常祠曹掾馮牟史郭玄辭對故事辟雍祠先聖太牢太祝各一人備爵太常丞監祠河南尹給牛羊豕大司農給米臣愚以爲如瑛言可許臣雄臣戒愚戇誠惶誠恐頓首頓首死罪死罪臣稽首以聞制曰可按漢書元嘉元年吳雄爲司徒二年趙戒爲司空卽此云臣雄臣戒是也魯相瑛者據碑言姓乙字仲卿漢碑在者多磨滅此幸完可讀錄之以見漢制三公奉事如此與羣臣上尚書者小異也又見漢祠孔子其禮如此

集古錄

右漢孔子廟置卒史碑其前有司徒吳雄司空趙戒  
奏章歐陽文忠公具載于集古錄其後又有魯相奏  
記司徒司空府文字尤爲完好云永興元年六月甲  
辰朔十八日辛酉魯相平行長文事下守長擅叩頭  
死罪敢言之司徒司空府壬寅詔書爲孔子廟置百  
石卒史一人掌主禮器選年四十以上經通一藝雜  
試能奉弘先聖之禮爲宗所歸者平叩頭死罪死罪  
謹按文書守文學掾魯孔龢師孔憲戶曹史孔覽等  
雜誠龢脩春秋嚴氏經通高第事親至孝能奉先聖  
之禮爲宗所歸除龢補名狀如牒平惶恐叩頭死罪

死罪上司空府其奏詞彬彬可喜故備錄之且以見  
漢時郡國奏記公府其體如此也漢華陽國志後漢  
書注皆云趙戒字志伯而此碑乃作意伯疑其避桓  
帝諱故改焉

金石錄

右漢魯相置孔子廟卒史碑今在曲阜蓋魯相乙瑛  
上書請置百石卒史一人與主守廟司徒吳雄司空  
趙戒以聞制從之蓋在元嘉三年三月後魯相平補  
以孔和上書於司空府則永興元年六月也攷之范  
史桓帝記元嘉惟有二年碑云元嘉三年三月者蓋  
是年五月始改永興至十月而雄戒亦罷免矣

此碑殘闕據宋洪丞相隸釋錄其全文蓋漢文高古  
難得將以供學士大夫之嗜好而不特此碑然也凡  
予之錄漢刻其殘闕者皆以洪本足之金薤琳琅

漢彭山碑

元嘉三年

魯陽縣彭山有廟廟前有碑桓帝元嘉三年杜仲長  
立城東水側有漢陽侯焦立碑彭水西北有漢安邑  
長尹儉墓石廟前有兩石闕闕東有碑水經注

漢孔德讓碑

永興二年

右漢孔德讓碑蓋其名已磨滅但云字德讓者宣尼  
公二十世孫都尉君之子也仕歷郡諸曹史年二十

永興二年七月遭疾不祿碑在今兗州孔子墓林中  
永興孝桓帝年號也余集錄所藏獨缺孔林中漢碑  
最後得此蓋其文字簡少無事實故世人遺而不取  
獨余家有之也集古錄

漢曹娥碑

上虞縣有曹娥碑娥父盱迎濤溺死娥時年十四哀  
父尸不測乃號躄江介因解衣投水呪曰若值父尸  
衣當沈若不值衣當浮裁落便沈娥遂於沈處赴水  
而死縣令度尚使外甥邯鄲子禮爲碑文以彰孝烈

水經注

漢東海相桓君海廟碑 永壽元年

右漢東海相桓君海廟碑云惟永壽元年春正月有漢東海相山陽滿君其餘文字完者尚多大畧記脩飾祠宇事而其銘詞有云浩浩滄海百川之宗知其為海廟碑也桓君與滿君皆不著其名莫知為何人

碑在今海州 金石錄

漢孔君碣 永壽元年

右漢孔君碣在孔子墓林中其額題孔君之墓文已殘缺其前云元年乙未而元年上闕二字按東漢自建武以後惟桓帝永壽元年歲次乙未其他有三乙

未皆非元年然則此碣所缺二字當為永壽也 金石錄

漢韓明府修孔子廟器碑 永壽二年

右漢韓明府修孔子廟器碑云永壽二年青<sub>土</sub>在涪灘霜月之靈皇極之日永壽桓帝年號也按爾雅云歲在申曰涪灘桓帝永興三年正月戊申大赦改元永壽明年丙申曰歲在涪灘是矣云霜月之靈皇極之日莫曉其義疑是九月五日前漢文章之盛庶幾三代之紀深自建武以後頓爾衰薄崔蔡之徒擅名當世然其筆力辭氣非出自自然與夫揚馬之言醇醜異味矣及其末也不勝其弊霜月皇極是何等語韓

明府者名勅字叔節前世見於史傳未有名敕者豈  
自余學之不博乎春秋左氏傳載古人命  
以為名者頗多故以敕為名者少也錄集古說不

漢韓明府修孔子廟碑其文雖剝缺然可句讀得之  
明府名勅字叔節歐陽永叔謂書傳無以勅命名者  
秦制天子之命為敕漢用秦法臣下不敢以勅名考  
之字書勅字從束誠也古者以勞賚為勅勅為賚音  
其文為徠別體當南齊時有劉勅為始興內史則古  
人名勅何世無之往時文嘉謨作縣樓架敕書於昌  
樂榜為敕書蜀中縣多作勅者說文敕音策馬筆也

勅音竒木別生也嘉謨勛之子勛有書名其子不能  
考古如此廣川書跋

右漢韓明府孔子廟碑其畧云君造立禮器樂之音  
符鐘磬瑟鼓雷洗觴觚爵鹿祖桓遵於禁喜脩飾宅  
廟更造二輿所謂鹿者禮圖不載莫知為何器又據  
字書於木皮可為索喜陳樂也亦非器名皆不可曉  
故并著其語以俟知者余後見汝陽陳氏所載古彝  
器亦全為鹿形疑所為鹿者  
因其形而名之耳金石錄

右漢魯相韓勅造孔廟禮器碑說者謂其文雜用識  
緯不可盡通予觀東漢自光武以赤伏符即位篤好

圖讖臣下則而效之流弊浸廣至漢之末而其說尤熾見之金石者不特此碑然也帝堯碑云堯遊於玄河之上有龍授圖堯乃受命成陽靈臺碑云堯母慶都遊觀河濱感赤龍交而生堯魯相史晨孔廟碑云孔子乾坤所挺西狩獲麟爲漢制作皆恠誕恍惚不經之甚後之君子以爲漢儒之陋狹如此而不知其所從來孔子曰上有好者下必有甚焉者矣以光武之明智而慮不及此嗚呼於漢儒乎何尤

漢韓敕碑陰

右韓勅碑陰隸釋所載凡六十有二人較予家舊榻

本闕三十有八人隸釋始由成侯王暉終洛陽王敬弔家本則始涿郡太守魯庶次公終河南樊文高又有大不同者豈隸釋得之傳錄故有此誤要當以撮本爲是抑此及史晨後碑歐陽公最號博古皆未之見唯趙氏金石錄有之

金薤琳琅

漢吉成侯州輔碑

永壽二年

犍縣渼水南有漢中常侍長樂太僕吉侯苞冢冢前有碑碑云六帝四后是詔是誨蓋仕自安帝沒于桓后干時閹閹擅權五侯暴世割剥公私以事生死石至千春不如速朽苞墓萬古祗彰誚辱

水經注

右漢吉成侯州輔碑名字已殘缺其額題云漢故中  
常侍長樂太僕吉成侯周君之銘輔名姓見范曄後  
漢書宦者傳以定策立桓帝與曹騰等七人同時封  
爲亭侯今此碑載當時詔書有云其封輔爲葉吉成  
侯以此知其名輔而酈道元注水經云渚水南有漢  
中當侍長樂太僕吉成侯州苞冢冢前有碑其詞云  
六帝四后是詔是誨今驗其銘文實有此語獨以輔  
爲苞蓋水經之誤當取漢史及此碑爲正

金石錄

漢州輔碑陰

右漢州輔碑陰京兆尹延篤叔堅而下題名者凡四

十餘人自東漢以後一時名鄉賢大夫死而立碑則  
門生故吏往往寓名其陰蓋欲附託以傳不朽爾今  
輔一宦者而碑陰列名者數十人雖顯人如延篤叔堅  
亦預焉亦可耻也夫

金石錄

漢州輔墓石獸膊字

右漢州輔墓石獸膊字酈道元注水經云州君墓有  
兩石獸已淪沒人有掘出一獸猶不全破甚高壯頭  
去地文許制作甚工左膊上刻作辟邪字余初得州  
君墓碑又覽水經所載意此字猶存會故人董之明  
守官汝穎間因託訪求之踰年持以見寄其一辟邪

道元所見也其一乃天祿字差大皆完好可喜之明  
又云天祿近歲爲村民所毀辟邪雖存然字畫已殘  
缺難辨此蓋十年前邑人所藏今不可復得矣金石錄

漢郎中鄭固碑

延熹元年

右漢郎中鄭固碑文字磨滅其官闕卒葬年月皆莫  
可考其僅可見者云君諱固字伯堅孝友著干閭門  
至行立乎鄉黨初授業於歐陽仕郡諸曹掾史主簿  
督郵五官掾功曹又曰忠以衛上清以自脩其餘殘  
缺不復成文又云延熹元年二月詔拜而不見其官  
惟其碑首題云漢故郎中鄭君之碑以此知其官至

郎中爾漢隸刻石存於今者少惟余以集錄之勤所  
得爲獨多然類多殘缺不完蓋其難得而可喜者其  
零落之餘尤爲可惜也集古錄

右漢郎中鄭君碑賈誼過秦論云九國之師遁巡而  
不敢進顏師古曰遁音千旬反流俗書本巡字誤作  
逃讀者因之而爲遁逃之義潘岳西征賦云遁逃以  
奔竄斯亦誤矣今此碑有云推賢達善遂遁退讓詳  
其文意亦是逡巡之義然二字決非一音蓋古用字  
與後世頗異又多假借故事有難曉處不知顏氏何  
所據遂音遁爲逡金石錄



右漢郎中鄭固碑歐陽公謂碑文磨滅官闕卒莖年  
月皆莫可考予家本磨滅尤甚蓋以去歐公之遠也  
而隸釋所載文字獨完其云君著君之子延熹元年  
四月廿四日遭命隕身年四十二則門闕與卒固可  
考也歐公所錄在隸釋之前而乃云云若此不可曉  
也

金薤  
琳琅

漢樊常侍碑

延熹  
元年

右漢樊常侍碑云君諱安字子佑南陽湖陽人幼學  
治漢詩論語孝經歷中黃門拜小黃門小黃門右史  
遷藏府令中常侍年五十有六永壽四年四一作二月

甲辰卒其先為中黃門後為小黃門又為小黃門右  
史蓋漢官之制今不詳其次序余少家漢東天聖四  
年舉進士赴尚書禮部道出湖陽見此碑下馬徘徊  
久之後三十年始得入集錄蓋初不見錄于世自予  
集錄古文時人稍稍知為可貴也

集古  
錄

漢常侍樊安碑永壽四年二月卒其後勒碑序所歷  
官今碑在唐州湖陽安故湖陽人也桓帝永壽三年  
是為延熹之元實自四年六月以改則此在二月故  
猶為永壽但立碑在後自宜以延熹為據漢自延年  
故制壞矣中常侍黃門增舊三倍於永平又改璫黃

金而貂右矣其勢傾天下觀東觀漢記書宦者蓋敘其所承本系如孫程曹騰爲康叔封曹叔振鐸後則史氏畏避不能直筆其敘事可得據邪今碑敘自中黃門遷常侍或疑其制蓋漢中世常侍千石小黃門六百石中黃門三百石中藏令六百石其序自應如此

廣川書跋

漢丹陽太守郭旻碑

延嘉元年

右漢丹陽太守郭旻碑云君諱旻字巨公有周之裔也又云治律小杜幼仕州郡察孝廉除郎中謁者遷敬陵園令廷尉左平治書侍御史獄刑無頗憲臺如

砥以父憂去官還拜郎中侍御史遭母憂服除復拜郎中治書侍御史遷冀州刺史徵拜尚書是時淮夷蠢迪帝疇官綏策書褒厲俚守丹陽爲政四年以公事去官年過耳順寢疾殞頽延熹元年十月戊戌卒其十二月丙申葬微言絕矣諸子曷仰三載禮闋迺群相與刻石勒銘最後云昔君卽世雖立碑頌裁足載字加有瑕下闕君之弟故太尉薨歸葬舊陵於是從子故五原太守鴻議郎果及胤孫某其名殘缺懷祖之德乃更刻石不改舊文益用昭明祖勳焉郭氏爲陽翟著姓自躬以來世以通法律顯名此碑所謂太尉

公者禧也

錄金石

漢議郎元賓碑

延熹二年

右漢議郎元賓碑者在今亳州姓名已殘缺所可見者云字元賓魯相之孫又云舉孝廉除倉龍司馬衛尉察尤異遷吳令親事二稔民用寧康州辟從事公車徵拜議郎年四十八延熹二年二月卒使者臨吊賻賜特加其餘文字完好者尚多惜其名氏皆亾也

錄金石

漢相王君造四縣郎碑

延熹二年

陳城內有王君碑文字剝落不可盡識其畧曰唯茲

陳國故曰淮陽郡云云王清惠著聞為百姓畏愛求賢養士千有餘人賜與田宅更自損奉錢助之成邸五官掾西華陳騏等二百五人以延熹二年云云故其頌曰脩德立功四縣同附今碑之左右遺墉尚存基礎猶在時人不復尋其碑証云孔子廟非學也

注

水經

漢孫叔敖碑

延熹三年

固始縣故寢地叔敖以土浸薄取而自封故能綿嗣城北猶有叔敖碑建武二年司空李通又慕叔敖受邑故光武以嘉之更名固始

水經注

右漢孫叔敖碑云名饒字叔敖史記不著其名而見於他書者亦皆叔敖以爲名而已微斯碑後世遂不復知其名饒也此碑世亦罕傳余以集錄二十年間求之博且勤乃得之然世之未見此碑者猶不知爲名饒也謂余集古爲無益可乎

集古錄

楚相孫叔敖碑漢延熹三年五月二十八日立固始縣令段君夢見因故祠架廟堂屋焉按叔敖相楚其事著於列子莊子左氏呂氏春秋賈子說苑等書太史公作史記不詳見而此碑當桓帝時能自叙列又多異闕疑當時別有書可據今考其碑曰叔敖病甚

臨卒將無棺槨令其子曰優孟曾許千金貸吾孟楚之樂長與相君相善雖言千金實不負也卒後數年莊王置酒以爲樂優孟乃言孫君相楚之功卽慷慨商歌曰貪吏而可爲而不可爲廉吏而可爲而不可爲貪吏而不可爲者當時有污名而可爲者子孫以家成廉吏而可爲者當時有清名而不可爲者其後躬祖而負薪貪吏常苦富廉吏常苦貧獨不見楚相孫叔敖廉潔不受錢涕泣數行王心感動覺悟問孟孟其列對卽求其子封於潘國下濕堯堉人所不貪遂封潘卿潘卿卽固始碑文於史記雖異其謂因窮

困而後封則同也昔叔敖曰楚人鬼而越人機可常有者惟寢丘至其後猶子孫守之則寢丘自是叔敖所命於其子者又何至乞食優孟而後封哉皆不可信也歐陽公常言非此碑不知叔敖名饒余求於書漢安順後諸儒競爲異說使學者奇偉所聞樂附從之如伏生爲勝毛公爲萇子賤爲宓皆西漢所不書其後應劭謂公羊爲高穀梁爲赤阮孝緒以穀梁爲傲沈以仲叔名貢至不知其時則又妄論何休呂公羊漢初人麋信呂穀梁秦孝公時而西漢皆謂子夏門人不知何考此碑謂叔敖名饒則有疑焉

廣川書跋

### 漢孫叔敖碑陰

右漢孫叔敖碑陰云延熹二年中夏之節政在封表期思長光視事一紀訪問國中耆年素聞孫君楚時良輔又云博采遺苗曾玄孫子考龜吉辰五月癸卯宜以存廢可立碑祀招請諸孫都會國右郭西道北處所顯好興上罕祭倡優鼓舞又云相君有三嗣長子卽封食邑固始少子在江陵中子居三下磨減一字又云相君卒後十有餘世有渤海太守其後歷叙子孫名字甚詳而文字斷續不可次第按期思長光碑陰不載姓氏叔敖碑雖有之然已殘缺矣

金石錄

漢封丘令王元賞碑

延熹四年

右漢封丘令王君碑其姓名已殘缺所可見者字元賞而已云察舉孝廉郎中謁者考工苑陵葉封丘令而銘文亦有撫臨三國之語歐陽公集古錄爲苑陵丞者蓋誤以葉字爲丞爾

金石錄

右漢王元賞碑云君諱某字元賞御史君之孫茂才君之子也歷秦及漢有國有家宰相牧守踵武相襲又曰遭父喪以孝立稱土堦環堵兼業並受門徒雨集盛於洙泗又云郡察孝廉郎中謁者宛陵丞封丘令母憂去官服祥辟司空司府延熹四年五月辛酉

遭命而終其文字磨滅隱隱可見者如此其名既亾又不序其姓惟其銘云於惟王君以此知其姓王爾

集古錄

漢王元賞碑陰

右漢王元賞碑陰載門生名姓有六人奔喪又斬杖三年余謂聖人之制禮爲可繼也無過與不及之弊務合於中庸而已禮曰事師無犯無隱服勤至死心喪三年孔子之喪門人疑所服子貢曰昔者夫子之喪顏回若喪子而無服喪子路亦然請喪夫子若喪父而無服彼漢人爲王君乃斬衰之服於禮無乃過

千金石錄

漢冀州刺史王純碑延熹四年

右漢冀州刺史王純碑延熹四年玄柔欽水經云濟水北逕須句城西酈道元注濟水西有安民山山西有漢冀州刺史王紉碑漢中平四年立按地里書須朐卽今中都縣此碑在中都又其官與姓氏皆合疑其是也然以純爲紛以延熹爲中平則疑水經之誤

錄金石

漢王純碑陰

右漢王純碑陰其前題門生人名自陳平馮定伯而

下文字完好可識者百九十餘人磨滅不可識者又九十餘人字畫淳勁可嘉其後題義士云各發聖心共出義錢埤碑石直刊紀姓名埤當讀為裨助之裨漢時墓碑多其門生故吏所立徃徃各紀姓名于碑陰或載所出錢數其非門生故吏而出錢者謂之義士今漢人爲王君出錢造碑而云發聖心可謂陋矣

錄金石

古今法書苑卷之五十七

古今法書苑卷之五十八

吳郡王世貞元美甫編

雲間王乾昌伯元甫校

十三之石

四

漢胡著碑

延熹四年

新野縣有漢南南太守胡著碑子珍騎都尉尚湖陽  
長公主卽光武之伯姊也廟堂皆以青石爲階陛廟  
北有石堂珍之玄孫桂陽太守瑒以延熹四年遭母  
憂于墓次立石祠勒銘于梁石字傾頽而梁字無毀

水經注

漢蒼頡廟人名

延熹五年



右漢蒼頡廟人名歐陽公集古錄云此碑有蓮勺左鄉有秋池陽左鄉有秩池陽集水有秩皆不知是何名號又有夏陽候長祿祠候長則是縣吏之名其字畫不甚精又無事實可考姑紀其名號以俟知者爾按前漢書張敞以鄉有秩補太守卒史後漢書百官志鄉置有秩三游徼本注曰有秩郡所署秩百戶掌一鄉人注引漢官曰鄉戶五千則置有秩風俗通曰秩則田間大夫言其官裁有秩蓋亦鄉吏名也金石錄漢成臯令任伯嗣碑延熹五年右漢成臯令任伯嗣碑其首已殘缺其可見者云字

伯嗣南郡編人也其先蓋任座之苗曹又云舉孝廉除郎中蜀郡府丞江州令以服去官爲筑陽侯相延熹五年遷來臨縣其後歷敘政績又云遷君桂陽最後云都邑謠詠甄勒勛績永昭千後碑在今汜水縣汜水在漢爲成臯此碑蓋成臯令德政煩爾後漢書桓帝紀延熹八年有桂陽太守任胤以此碑校之歲月相符又名與字協知其名胤也金石錄漢朔方太守碑陰延熹五年右漢朔方太守碑陰題名云永壽二年朔方太守上郡仇君察察下減一字除郎中大曲長大下又減一

字延熹四年九月乙酉詔書遷衙令五年正月到官  
奉見明府見下又滅一字立祠刻石表章大聖之遺  
靈永示來世之末一作未下又滅一字謹出錢千千  
下又滅兩字者下行因紀姓名七字無據此乃當時修  
廟出錢人爾今姓名往往可見云衙卿三老時勤伯  
秋上官鳳季方錄事史揚禹孟布衙主記掾楊綬子  
長門下功曹裴篤伯安倉曹掾任就子優又有集曹  
掾軍一作君假司馬之類名字多不完其所出錢不過  
三百至五百蓋漢世物輕幣重今華嶽孔子廟碑陰  
所列亦皆如此其所立祠蓋不知爲何廟也集古錄

漢高陽廣野君碑

延熹六年

高陽者陳留北縣也延熹六年十二月雍丘令董生  
命縣人萇照爲文今故字無聞而豐碑介立矣陳留  
風俗傳曰酈氏居于高陽沛公攻陳留食其有功封  
高陽侯酈峻字文山官至公府掾事大將軍商有功  
食邑千畝水經注

漢偃師廣野君碑

年次無考附高陽碑後

陽渠水東流逕食其廟南廟在北山上成公綏所謂  
偃師西山也山上舊基尚存廟宇東西門有兩石人  
對倚北石人曾前銘云門亭長石人西有二石闕雖

經頽毀猶高丈餘闕西卽廟故基也基前有碑文字  
剝缺不復可識

水經注

漢任伯嗣碑陰

右漢任伯嗣碑陰大觀初獲此碑寘于汜水輦運司  
廨舍壁間余聞其陰有字因託人諷邑官破壁出之  
遂得此本蓋漢碑有陰者十七人世多棄而不錄爾

金石錄

漢桐柏廟碑

延熹六年

右漢桐柏廟碑磨滅雖不甚而文字斷續粗可考次  
蓋南陽太守修廟碑也其辭云延熹六年五月乙酉

南陽太守中山盧奴君奴下正闕一字當是其姓又  
云尊神敬祀立廟桐柏春秋宗崇災異告變水旱請  
求位比諸侯聖漢所尊太守奉祀二十餘年不復身  
至遣丞行事簡略不敬明神不歆災害以生五嶽四  
瀆與天合德仲尼慎祭常若神在君準則大聖親之  
桐柏來見廟祠崎嶇逼狹開拓神門立闕四望增廣  
壇場又云執玉以沈爲民祈福靈祇報祐天地清和  
其大意止於如此其後有頌亦可讀第不見太守姓  
名爾然不著他事惟修廟祀神爾桐柏淮瀆廟也

錄

古集

漢平輿令薛君碑

延熹六年

右漢平輿令薛君碑文字完好云惟延熹六年春二月平輿令薛君卒鳥虬哀哉吏民其咨咨君之德廼建碑石于墓之側其後有銘三百餘言叙述甚詳惟不載其名字世系故莫得而考焉

金石錄

漢山陰太守祝睦碑

延熹七年

右漢祝睦碑云君諱睦字元其下遂缺滅不能成文惟其官壽年月可見云賓于王庭除北海長史潁川鄆令辟司空府北軍中候拜大尚書尚書僕射遷常山相山陽太守年六十有八延熹七年八月丁巳卒

睦有二碑皆在今南京虞城縣此碑不見世次而隱錄隱有云其先高辛爾其後碑則頗完故錄于次也集

後漢祝睦後碑其前碑不知所立人名氏兩碑所載官闕壽考年月悉同而此碑有立碑人名氏及睦世次云故吏王堂等竊聞下有述上之功臣有敘君之德又曰君兆自黎辛祝融苗胃鄭有祝聃君其胤也其餘文字亦完可讀二銘皆以三言爲文而後銘尤云穆我君邦之陽資五就闔道網網下滅一字表微準樞衡稽列宿覽四方德合乾道應皇領二郡曜

重光化流浹緄昌性天約元用長頌聲作謠令香  
功烈著遺椒芳存覲榮淪弗忘其後二句磨滅難詳  
故錄其成文以見其雅實亦可佳也 集古錄

漢泰山都尉孔宙碑

延熹七年

右漢泰山都尉孔君碑云君諱宙字季將

二字一作秀特

子十九世之孫也年六十一延熹四年正月乙未以

侯卒

一有干家二字

其序官閱甚簡又或殘滅不完但見其

舉孝廉為郎遷元城令遂為泰山都尉爾其辭有云  
躬忠恕以及人兼禹湯之罪已宙人臣而引禹湯以  
為北在今人於文為不類蓋漢世近古簡質猶如此

也 集古錄

右漢泰山都尉孔宙碑宙北海父也見後漢書融

列傳又據桓帝紀泰山都尉元壽元年置延熹八年

罷宙以延熹四年卒蓋卒後四年官遂廢矣

金石錄

漢泰山都尉孔宙碑延熹四年書敘舉孝廉歷元城  
令泰山都尉曰躬忠恕以及人兼禹湯之罪已夫禹  
湯用之泰山都尉亦自不類謂罪已尤不得施宙之  
善不過引過自居不以予人可便謂罪已乎漢世文  
物至東京衰陋已如此嘗恠三代文字之盛其見於  
鼎鐘簡冊不入詩書尚多有之渾厚尊嚴如冠劍大

人黼黻以朝坐清廟而走羣后使人仰俛有愧何後  
之人不若邪余讀屈原書以朕自况周泰六國間凡  
人相與言皆自臣也左氏書子皮即位叔向言罕樂  
得其國葉公作顧命楚漢之際爲世本者用之潘岳  
奉其母稱萬壽以獻觴張永謂其父桓大行屈道孫  
盛文登遐蕭惠開對劉成甚如慈旨竟陵語顧憲之  
曰非君無以聞此德音鮑照於始興王則謂不足宣  
贊聖旨晉武詔山濤曰若居諒闇情在難奪夫顧命  
萬壽大行慈旨諒闇德音後世人臣不得用之其以  
朕自况與稱臣對客自漢已絕况後世多忌而得用

耶廣川  
書跋

右漢泰山都尉孔宙碑宙孔子十九世孫而融之父  
也其事實不見史傳然碑稱其齊聖達道德音孔昭  
又稱其治泰山旬月之間民皆解甲服罪可謂無愧  
聖人之後者碑在曲阜延熹七年立通志金石畧嘗  
載目云未詳所在復載泰山太守孔宙碑云在兗州  
立於延熹六年是漢有兩孔宙而碑復有二何其繆

哉金薤  
琳琅

漢孔宙碑陰

右漢孔宙碑陰題名漢世公卿多自教授聚徒常數

百人其親授業者爲弟子轉相傳授者爲門生今宙  
碑殘缺其姓名邑里僅可見者纔六十二人其稱弟  
子者十人門生者四十三人故吏者八人故民者一  
人

集古錄

右漢孔宙碑陰門生有鉅鹿廣宗補廵字升臺按氏  
族書如姓苑姓纂皆無捕姓獨見于此碑爾

金石錄

右孔宙碑陰不云碑陰而云門生故吏名此漢碑中  
之僅見者前碑云故吏門人陟山采石勒銘示後則  
此所載皆其人也今按宙門生四十二人門童一人  
弟子一人故吏八人故民一人隸釋謂漢儒開門授

徒親受業者則曰弟子次相傳授則曰門生未冠則  
曰門童總而稱之亦曰門生舊所治官府其掾屬則  
曰故吏占籍者則曰故民非吏非民則曰處士素非  
所蒞則曰義士義民此皆讀漢碑者之所當知而隸  
釋人間少傳故著之

金薤  
琳琅

漢西嶽華山廟碑

延熹八年

右漢西嶽華山廟碑文字尚完可讀其述自漢以來  
云高祖初興改秦淫祀太宗詔有司其山川在諸侯  
者以時祠之孝武修封禪之禮廵省五嶽立宮其下  
宮曰集靈殿曰存僊門曰望僊中宗使者持節歲一

禱三祠後不承前至於亡新寢用丘虛建武之元事  
舉其中禮從其省但使二千石歲時往祠自是以來  
百有餘年所立碑石文字磨滅延熹四年弘農太守  
袁逢修廢起頓易碑飾闕會遷京兆尹孫府君到欽  
若嘉業遵而成之孫府君諱璆其大略如此所謂集  
靈宮者他書皆不見惟見此碑則余之集錄不爲無  
益矣

集古錄

右漢西嶽華山廟碑其略云孝武皇帝修封禪之禮  
巡省五嶽立宮其下宮曰集靈宮殿曰存仙殿門曰  
望仙門歐陽公集古錄云所謂集靈者他書不見惟

見於此碑爾余按班固漢書地理志華陰有集靈宮  
武帝起而酈道元注水經亦云敷水北逕集靈宮引  
地理志所載其語皆同然則不獨見于此碑矣而所  
謂存仙殿望仙門者諸書不載

金石錄

西嶽華山碑漢延熹四年弘農太守孫璆建書曰五  
帝巡狩五嶽立宮其下宮曰集靈殿曰集仙歐陽公  
謂集靈宮惟見於此按漢武集靈宮建於太華漢志  
書之桓譚賦之酈道元曰敷水北逕集靈宮其事甚  
備永叔惜不得見也考三轉黃圖與劉勰張昞所言

集靈亦其盛哉

廣川書跋



歐陽文忠集古錄云所謂集靈他書皆不見惟見此碑某按漢書地理志云太華山在華陽南有祠集靈宮亦桓譚僊賦敘云華山下有集靈宮漢武帝欲懷集僊者故名殿爲存僊門爲望僊二書所言其詳如此則集靈宮不獨見於此碑也文忠博古矣時有舛漏後學可忽諸黃某記

右漢西嶽華山廟碑予得之御史宋君良弼集古錄引碑文云漢武帝巡省五嶽立宮其下宮曰集靈殿曰存仙門曰望仙而以爲集靈宮者他書皆不見惟見此碑金石錄引漢地理志云華陰有集靈宮水經

注云數水北經集靈宮而謂不特此碑載之及觀之董氏書跋云集靈宮漢志旣書之桓譚嘗賦之張泉序曰世宗經集靈之宮而復謂三輔黃圖書其制度藝文類聚一書其名則又金石錄之所未及者此亦可以見博古之難矣此碑後題云新豐郭香察書楊文貞公跋謂漢魏之碑多不載書刻人氏名此獨詳焉遂因之有聞於今而文貞惟以爲郭香書而不曰香察其意蓋疑香察不類人名故也隸釋云東漢循王莽之禁人無二名郭香察書者察蒞他人之書其說爲此得文貞之所未知然洪氏亦不言爲何人書

也按徐浩古迹記以碑爲蔡中郎書浩深於字學且生唐盛時殆非鑿空而言者洪氏失之於攷不耳

琅琳

漢老子銘

延熹八年

右漢老子銘按桓帝本紀云延熹八年正月遣中常侍左棺之苦縣祠老子至十一月又遣中常侍管霸祠之而此碑云八月夢見老子而祠之世言碑銘蔡邕作今檢邕集無此文皆不可知也

集古錄

右漢老子銘舊傳蔡邕文拜書蓋杜甫李潮小篆八分歌有曰苦縣光和尚骨立書貴瘦硬方通神世云

此碑是也今驗其詞乃邊韶延熹八年作非光和中所立未知甫所見是此碑否而本朝周越書苑遂以爲韶撰文而邕書初無所據碑言孔子學禮時計其年紀聃已二百餘歲聃然老旄之貌也而史記謚曰聃按古謚法無聃字又碑云孔子以周靈王二十二年生今以年表及世家考之孔子以魯襄公二十二年生實靈王二十一年未知孰是又周太史儋事云孔子歿後二百二十九年徐廣注曰實一十九年今此碑所書正與史合不知徐廣何所據也

金石錄

漢王子喬碑

延熹八年

蒙縣有王子喬冢冢側有碑題云仙人王子喬碑曰  
王子喬者蓋上世之真人聞其仙不知興何代也博  
問道家或言隸州或言產蒙初建此城則有斯立傳  
承先民曰王氏墓暨于永和之元年冬十二月當臘  
之時冢上有哭聲其音甚哀附居者王伯恠之明則  
祭而察焉時天雨雪下無人徑有大鳥跡在祭祀處  
左右咸以爲神其後有人著大冠絳單衣杖竹立冢  
前呼採薪儒子伊永昌曰我王子喬也勿得取吾墳  
上樹也忽然不見時令太山萬喜稽故老之言感精  
瑞之應乃造靈廟以休厥神於是好道之疇自遠方

集或絃琴以歌太一或譚思以歷丹思知至德之兆  
寔真人之祖先延熹八年秋八月皇帝遣使者奉犧  
牲致禮祠濯之敬肅如也國相東萊王璋字伯義以  
爲神聖所興必銘表乃與長史也乾遂樹之玄石紀  
頌遺烈水經注

漢沛邑高廟碑延熹十年

小沛縣泗水東岸有亭漢祖爲泗水亭長卽此亭也  
故亭今有高廟廟前有碑延熹十年立廟闕崩禱略  
無全者水中有故石梁處遺石尚存水經注  
漢淮源廟三碑延熹中

復陽山南有淮源廟廟前有碑是南陽郭苞立又二碑並是漢延熹中守令所造文辭鄙拙治不可觀經水注

漢温令許續碑延熹中

過水之北有漢温令許續碑續字嗣公陳國人也舉賢良拜議郎遷温令延熹中立水經注

漢堯祠祈雨碑延熹十年

右漢堯祠祈雨碑首尾殘滅其僅可識者有云股肱賢良廣祈多福虔虔夙夜又云常以甲子日詔太常陳上古之禮舞先王之樂又云延熹十年仲春二月

陽氣侵陰又云享祀羣神瞻仰雲漢又曰嘉澍優霑利茂萬物又云孟府君知堯精靈與天通神修治大殿以此知爲祈雨於堯祠也堯祠在漢濟郡孟府君者當是濟陰郡太守也其餘隸字完者頗多亦往往成句但斷續不可次序爾集古錄

漢荊州刺史度尚碑永康元年

右漢度尚碑其首題曰漢故荊州刺史度侯之碑碑云其先出自顓頊與楚同姓熊下缺之後又曰統國法度其下缺殘不可辨按元和姓纂度但云古掌度之官因以命氏不言其與楚同姓也又范曄後漢書

列傳度自右校令擢爲荊州刺史破長沙零陵賊以  
功封右鄉侯遷桂陽太守徵還京師以中郎將破賊  
胡闌等復爲荊州刺史後爲遼東太守卒於官今以  
碑考之云封右鄉侯遷遼東太守拜中郎將復拜荆  
州刺史以故秩居蓋未嘗爲桂陽太守而曰卒於遼  
東者皆史之誤

金石錄

右漢荊州刺史度尚碑尚後漢書有傳碑今在徐州  
州治蓋成化間吾鄉顧君崇善以工部郎管理河道  
見其淪於湖陵城間出之遂置於此按酈道元水經  
注云湖陵城東有度尚碑則自漢至晉自晉至今而

此碑未嘗徙也又隸釋云政和中巡檢王當世見其  
在湖陵荒野遷之官廨後邑令滕君欲徙碑於沛舟  
載而覆沈沒不出又其後劉宗儀攝令乃立之於使  
星亭然不知此碑何年復淪入水中今惟存其首漢  
荊州勅史度侯之碑九字其餘文字悉皆漫滅特頑  
然片石而已蓋閘水撞激日久其字之不存宜也

琳瑯

漢馮使君墓闕銘

無年月今錄于子緄碑前

右漢馮使君墓闕銘云故尚書侍郎河南京令豫州  
刺史馮使君神道按後漢書馮緄傳緄父煥安帝時

爲幽州刺史而緄碑亦云幽州君之元子此字在宕渠緄墓前雙石闕上知其爲煥闕也金石錄

漢車騎將軍馮緄碑

永康元年

右漢車騎將軍馮緄碑以范曄後漢書考之史云字鴻卿而碑云皇卿史云初舉孝廉七遷至廣漢屬國都尉拜御史中丞順帝末持節揚州諸軍事與中郎將滕撫擊破羣賊今據碑自舉孝廉至爲廣漢屬國都尉凡十一遷而爲中丞與督使徐揚二州討賊皆在爲都尉前碑云討賊時坐迫州縣正法而史不載又云爲隴西太守坐問吏辜旬不分去官以羌駭動

爲四府所表復家拜隴西太守而史但言遷隴西太守耳史云爲遼東太守徵拜京兆尹轉司隸校尉遷廷尉太常拜車騎將軍以碑考之緄爲遼東太守以前嘗復爲治書侍御史遷尚書遂爲廷尉未嘗拜京兆尹及司隸也史云振旅還京師監軍使者張敞承宦者旨奏緄會長沙賊復起攻桂陽武陵緄以軍還盜賊復發榮免而碑云臨當受封以謠言奏河內太守中常侍左悺弟坐遜位事復拜廷尉時山陽太守單遷以臯繫獄緄致其死遷故車騎將軍超之弟中官相黨遂共誹章誣緄坐輸左校而碑云表荊州

刺史李隗南陽太守成晉

晉漢石作籍

太原太守劉瑱不

宜以重論坐正法作左校亦皆不合史又云爲河南尹時上言舊興中官：弟不得爲牧人職帝不納拜屯騎將軍復爲廷尉卒於官而碑云復延尉奏中官子弟不宜興牧州郡獲過左右遜位永康元年薨亦當以碑爲正碑又云緄謚曰桓而史亦不載余嘗謂石刻所書名字官爵可信無疑至於善惡大節則當以史氏爲據今此傳首尾顛倒錯謬如此則史之所載是非褒貶失其實者多矣果可盡信邪

金石錄

漢魯相晨謁孔子冢文

建寧元年

右漢魯相晨謁孔子冢文已斷裂闕其上一段其略可見者云建寧元年三月十八日丙申晨又云其四月十一日戊子到官謁孔子冢其他文字雖完皆不可次第魯相晨有兩碑皆在孔子廟中其一云臣蒙恩受任符守得奎婁周孔舊寓又云臣以建寧元年到官其一碑云魯相河南史君諱晨字伯時從越騎校尉拜以建寧元年四月十一日戊子到官然則斯碑所載名晨者魯相史晨也

金石錄

漢沛相楊君碑

建寧元年

右漢沛相楊君碑在閔鄉楊震墓側碑首尾不完失

其名字惟其銘云明明揚君爾按後漢書震及中子  
秉秉子賜賜子彪皆有傳又云震長子牧富波相牧  
孫竒侍中竒子亮陽成亭侯又云少子奉奉子敷敷  
子衆務亭侯又有彪彪子修楊氏子孫載干史傳者  
止此爾不知沛相爲何人也碑云孝順皇帝西巡以  
掾史召見嘉其忠臣之苗器其璵璠之質詔拜郎中  
遷常山長史換掾爲府丞宰司累辟應干司徒州察  
茂才遷鮑陽侯桓後拜議郎五官中郎將沛相干五  
十八建寧元年六月癸丑遘疾而卒其終始尚可見  
而惜其名字亡矣

集古錄

漢魯相晨孔子廟碑

建寧二年

右漢魯相上尚書章其略云建寧二年三月癸卯朔  
七日己酉魯相臣晨長史臣謙頓首死罪上尚書臣  
晨頓首頓首死罪死罪臣以元年到官行秋饗飲酒  
泮宮復禮孔子宅而無公出酒脯之祠臣輒依社稷  
出王家穀春秋行禮建寧靈帝年號也於此見漢制  
天子之尊其辭稱頓首死罪而不敢斥至尊因尚書  
以致達而已余家漢碑獨斯碑首尾完備可見當時  
之制又云孔子乾坤所挺西狩獲麟爲漢制作故孝  
經援神契曰玄丘制命帝卯行又尚書考靈耀曰丘



生倉際觸其稽度爲赤制識緯不經不待論而可知甚矣漢儒之狹陋也孔子作春秋豈區區爲漢而已哉

集古錄

右史晨孔子廟後碑載當時廟享觀禮者自長史李謙五官掾孔暢而下凡九百七人可謂盛矣廟享之後晨復修瀆治井及置守墓之人盖不但如前碑所云出俸錢以供祀事其有功於孔氏甚大而部史仇誦縣吏劉耽亦復補垣除道至通大溝則晨固有以啓之也吁晨誠賢矣哉

金薤琳琅

右漢魯相晨孔子廟碑靈帝建寧二年立晨姓字見

於後碑此乃其所上尚書奏章盖當時之制郡國不敢直聞朝廷因尚書以達之也碑云到官秋享無公出酒脯之祠自用俸錢以供禋祀知其爲魯之賢相也

金薤琳琅

漢金鄉守長侯君碑

建寧二年

右漢金鄉守長侯君碑云君諱成字伯盛山陽防東人也其先出自豳岐周文之後封於鄭鄭共仲賜氏曰侯厥胤宣多以功佐國漢之興也侯公納策濟太上皇於鴻溝之阨謚曰安國君曾孫酺封明統侯光武中興玄孫霸爲臨淮太守轉拜執法左右刺姦五

威司命大司徒公封於陵侯枝葉繁茂或家河洧或  
邑山濟君即上黨太守之弟郡請署主簿督郵五官  
掾功曹守金鄉長建寧二年四月癸酉卒年八十一  
碑文首尾皆完故得詳其世次其上黨太守不見  
其名按漢書執法左右刺姦五威司命皆王莽官名  
侯霸列傳云霸莽時爲隨令遷執法刺姦而未嘗爲  
五威司命後事光武代伏湛爲大司徒封關內侯既  
薨光武下詔追封則鄉侯而此碑言封於陵侯未知  
孰是據碑言刺姦司命爲光武時官蓋碑文之繆矣

集古錄

右漢金鄉守長侯君碑載其上世云漢興侯公納策  
濟太上皇於鴻溝之阨謚曰安國君曾孫酺封明統  
侯光武中興玄孫霸爲臨淮太守擁兵從光武平定  
天下轉拜執法刺姦五威司命大司徒公封於陵侯  
歐陽公集古錄云執法左右刺姦五威司命皆王莽  
時官侯霸列傳云霸莽時爲隨令遷執法刺姦而未  
嘗爲五威司命後代伏湛爲大司徒封關內侯既薨  
光武下詔追封則鄉侯而此碑言封於陵侯未知孰  
是據碑言刺姦司命爲光武時蓋碑之謬余按霸列  
傳霸薨追封則鄉侯至子昱改封於陵而遂以霸爲

於陵侯疑亦碑之誤又按高祖紀侯公說項羽歸太公呂后乃封侯公爲平國君今此碑言安國旣不同而平國君乃生時稱號如婁敬爲奉春君之類碑以爲謚恐亦非是又酺封明統侯漢書功臣表亦不載不知碑何所據也

金石錄

漢柳孝廉碑

建寧二年

右漢柳孝廉碑云君諱敏其先蓋五行星下字缺二十八舍柳宿之精也其說亦可謂恠矣自戰國以來聖人不作諸子百家異端恠說紛然而起其弊至東漢而極焉若此直以柳君得姓出于柳宿果何所據哉

金石錄

漢衛尉卿衡方碑

建寧三年

右漢衡方碑云府君諱方字興祖其先伊尹在殷號稱阿衡因而氏焉又曰州舉孝廉除郎中郎丘侯相膠東令州舉尤異遷會稽東部都尉又拜議郎北平太守遷潁川太守又曰拜步兵校尉年六十有三建寧元年二月五日癸丑卒於是海內門生故吏采嘉石樹靈碑鐫茂伐祕將來此其始終之大略其餘歷歷可見而時亦磨滅以其文多不備錄也

集古錄

右漢衛尉卿衡方碑有云感昔人之凱風悼慕儀之

劬勞以蓼莪為蓼儀他漢碑多如此蓋漢人各以其學名家固所傳時有異同也金石錄

右漢衛尉衡方碑其敘門閥云伊尹在殷號稱阿衡因以為氏君考盧江太守兄鴈門太守敘官秩云歷郎中即丘侯相膠東令遷會稽東部都尉徵拜議郎北平潁川兩太守太醫令京兆尹入登衛尉至步兵校尉敘卒葬云年六十三建寧元年二月五日癸丑卒其年九月十七日辛酉葬文字詳悉頗完好漢碑中之不易得者洪丞相謂碑云履該顏原即顏淵原憲予觀其下繼之云兼修季由蓋仲由一字季路季

由即季路也

金薤琳琅

漢冀州從事張表碑

建寧三年

右漢冀州從事張表碑云君諱表字元異其碑首題云漢故冀州從事張君碑而文為韻語教其官閥不甚詳但云春秋六十四以建寧元年三月癸巳薨疾而終其辭有云仕郡為督郵鷹撮盧擊是以狗喻人也又有畔桓利正之語蓋漢人猶質不嫌取類於鷹犬畔桓疑是盤桓漢時文字簡少假借爾集古錄  
漢淳于長夏承碑建寧三年  
右漢淳于長夏承碑云君諱承字仲充東萊府君之

孫太尉掾之中子中郎將弟也累葉牧守印紱典據  
十有餘人寵祿傳于歷世榮勳著于王室君鍾其美  
受性淵懿倉和覆仁治詩尚書兼覽羣藝州郡更請  
為主簿督郵五官掾功曹上計掾守令冀州從事又  
云察孝不行太傅胡公旌招四府歸高除淳于長又  
云年五十有六建寧三年六月癸巳淹疾卒官碑在  
今洛州元祐間因治河堤得于土壤中建寧靈帝時  
年號也距今千載矣而刻畫完好如新余家所藏漢  
碑二百餘卷獨此碑最完

金石錄

右漢淳于長夏承碑金石錄云元祐中洛州因治河

得之於土壤中刻畫完好如新隸釋云此碑字體奇  
恠唐人蓋所祖述又引梁庾元威論書載錄有十餘  
種此乃其間之一體宋鄭僑書衡云漢石經諸刻乃  
隸體八分夏承碑乃篆體八分然三家皆不言為何  
人書也元王文定公惲跋此碑云蔡邕書夏承碑如  
夏金鑄鼎形模恠詞雖蛇神牛鬼龐雜百出而衣冠  
禮樂已胚胎乎其中所謂氣凌百代筆陣室堂者乎  
予由是始知爲中郎之蹟碑在廣平府學後刻尚書  
蔡邕伯喈及永樂七年等字乃庸妄人所加然心竊  
疑之揚文貞公集中亦有此跋謂近歲廣平府民因

治河得此蓋廣平古洛地也所謂近歲恐即永樂七年予向官京師時廣平通判山西宋孟清爲予言府學復有一碑字與此類予益疑焉江陰徐子擴好音士也嘗得舊刻雙鉤其字近惠予與此絕異此云動紹舊刻作勤約且其間字之闕者四十有五而此獨完好則其僞不俟乎言而予昔日之疑始釋然矣楊公跋又謂中書舍人陳登以碑爲蔡伯喈書蓋不攷王氏文集之故後公撰登墓志言永樂間以篆書名者登之外有吳中滕用亨四明王尹實予觀三家之篆用亨第一登不能逮若尹實則惟用燥筆又在

登之下登門人有程南雲者以篆書得至顯官其用筆雖熟然殊乏古法觀此亦可以知其師矣

金薤琳琅

漢郎中馬君碑

建寧三年

右漢郎中馬君碑文字殘缺所可見者字元海而已又云其先賜號馬服因遂氏焉又云以和平元年舉孝廉除郎中謙虛接下冠名三署又云年四十元嘉三年正月卒又曰夫人年五十五建寧三年十二月卒其他不可考究矣

金石錄

漢徵士郭林宗宋子浚二碑

建寧四年

介休縣城東有徵士郭林宗宋子浚二碑宋冲以有

道司徒徵林宗辟司徒舉太尉以疾辭其碑文云將  
蹈洪崖之遐迹紹巢由之逸軌翔區外以舒翼起天  
路以高峙稟命不融享年四十有三建寧四年正月  
丁亥卒凡我四方同好之人永懷哀痛乃樹碑表墓  
銘景行云陳留蔡伯喈范陽盧子幹扶風馬日磾等  
遠來奔喪朋友服心喪暮年者如韓子助宋子浚等  
二十四人其餘門人著錫哀者千數其碑文故蔡伯  
喈謂盧子幹馬日磾曰吾爲天下碑文多矣皆有慙  
容唯郭有道無愧於色矣水經注

漢北軍中侯郭君碑

建寧四年

右漢北軍中侯郭君碑其名字磨滅云元城君第四  
子也其先蓋周之胄緒枝葉雲布列於州郡自東郡  
南國家於河內汲兄竹邑侯相次尚書侍郎次濟北  
相順弟臨沂長次徐州刺史次中山相次雒陽令君  
爲五官掾功曹司隸中都官從事三辟將軍府舉孝  
廉比陽長復辟司徒拜北軍中侯年六十有六建寧  
四年九月丙子卒其於兄竹邑侯相上一字缺滅不  
完疑是惠字其下又云順弟莫曉其義豈漢人謂兄  
弟爲此語耶集古錄

漢慎令劉君墓碑

建寧四年

右漢慎令劉君墓碑在今南京下邑其名已磨滅其  
字伯麟少罹艱苦身服田畝舉孝廉除郎中辟從事  
司徒掾遷慎令卒年六十有二其銘曰於惟君德忠  
孝正直至行通洞高明柔剋鬼神福謙受茲介福知  
命不延引與旋歸忽然輕舉志激拔葵人皆有仁貴  
終譽兮歿而不朽垂名著兮余家漢碑常患其銘多  
缺滅而斯銘偶完故錄之

集古錄

漢博陵太守孔彪碑

建宣日年

右漢孔君碑其名字磨滅不可見而世次官闕粗可  
考云孔子十九代孫潁川君之元子也舉孝廉除郎

中博昌長遭太守君憂服竟拜尚書侍郎治書御史  
博陵太守遷下邳相河東太守建寧四年十月卒其  
餘文字歷歷可讀以其斷絕處多文理難續故不復  
盡錄然其終始畧可見矣惟其名字皆亡爲可惜也

集古錄

右漢博陵太守孔彪碑歐陽公集古錄云名字磨滅  
不可見而世次官闕粗可考今此碑雖殘缺而名字  
尚完可識云君諱彪字元上又韓府君孔子廟碑陰  
載當時出錢人名亦有尚書侍郎孔彪元上與此書  
正同惟孔君自博陵再遷爲河東太守而碑額題故



博陵太守孔君碑漢人多如此然莫曉其何謂也金石錄

右漢博陵太守孔彪碑彪孔子十九世孫與孔宙蓋弟兄行嘗爲尚書侍郎治書御史可謂顯矣闕里志世表宗譜皆不見其名字而碑文類此亦不載向微揚本之存則後世不復知有彪矣金薤珠琅

漢敖城石門銘建寧四年

王景樂浪人善治水王昊始作浚儀渠用景法乃不害永平十五年明帝嘉景功拜河隄謁者靈渠口謂之石門廣十餘丈西去河三里石銘曰建寧四年十

一月黃場石也而主吏姓名磨滅不可復識水經注

漢析里橋郝閣頌建寧五年

右漢析里橋郝閣頌建寧五年立云惟斯析里處漢之右溪源漂疾橫注于道涉秋霖澹稽滯商旅休謁往還常失日晷行理咨嗟郡縣所苦斯溪旣然郝閣尤甚臨深長淵三百餘丈接木相連號爲萬柱遭遇隕納人物俱隋一作隳沈沒洪淵酷烈爲禍於是太守尙陽李君諱會字伯都以建寧三年二月辛巳到官思惟直利有以綏濟聞此爲難其日久矣乃俾府掾仇審改解危殆即便求隱析里大橋於爾乃造又醜

散關之嶮濶徙朝陽之平煇減西高閣就安寧之石  
道禹導江河以靖四海經紀厥績又康萬里乃作頌  
曰頌後又有詩皆磨滅不完其云遭遇隕納又云醜  
散關之嶮濶徙朝陽之平煇刻畫適完非其訛謬而  
莫詳其義疑當時人語與今異又疑漢人用字簡略  
假借不同爾

集古錄

漢郝閣當析橋建寧五年李君諱會字伯都析里大  
橋於今迺造其言斯溪旣然郝閣尤甚臨深長淵三  
百餘丈接木相連號爲萬柱碑今所見如此考其地  
當闕而郝閣無存迹昔歐陽文忠公嘗疑醜散關之

嶮濶徙朝陽之平煇按羃古文顯字濶川漢作濕讀  
謂川在卑濕書學至今同文古字濕作醜又作醜故  
漢人濕又作累然則濶當作濕燥古文作煇蓋臬與  
參同體其言醜則與易同上用醜亦易也至謂遭遇  
隕納則以傾隕地壤自納於淵漢人文陋無足道然  
用字亦本古也

廣川書跋

右漢武都太守李翕碑文字首尾完好云漢故武都  
太守漢陽阿陽李君諱翕字伯都其後歷叙在郡治  
蹟云郡西狹中道危難阻峻下有不測之谿車騎數  
有顛覆隕墜之害君勅衡官有秩李瑾掾仇審因常

繇道減高就埤桺致土石堅固廣大可以夜涉民歌  
德惠乃刊斯石其後有頌詩最後題建寧五年六月  
十三日壬寅造云金石錄

漢武都太守漢陽阿陽李翕西狹頌武都太守漢陽  
阿陽李翕字伯都以郡之西狹閣道通梁益緣壁立  
之山臨不測之溪危難阻峻數有顛覆賈隆之害乃  
與功曹吏李旻定筴勅衡官掾仇審治東坡有秩李  
瑾治西坂鑿燒大石改高即乎正曲廣院既成人得  
夷塗可以夜涉廼相與作頌刻石其頌有二其所識  
一也其一立於建寧四年六月十三日壬寅其一是

年六月三十日立也又稱翕嘗令澗池治峭嶽之道  
有黃龍白鹿之瑞其後治武都又有嘉禾甘露木連  
理之祥皆圖書其像刻石在側蓋嘉祐之間晁仲約  
質夫爲興州還京師得郿閣頌以遺余稱析里橋郿  
閣漢武都太守阿陽卒翕字伯都之所建以去沈淪  
之患而翕字殘缺不可辨得歐陽永叔集古錄目跋  
尾以爲李會余亦意其然及熙寧十年馬城中玉爲  
轉運判官於江西出成州所得此頌以視余始知其  
爲李翕也永叔於學博矣其於是正文字尤審然一  
以其意實之遂不能無失則古之人所以闕疑其可

忽歟近世士大夫喜藏畫自晉已來若能畫者其筆  
迹有存於尺帛幅紙蓋莫知真偽徃徃皆傳而貴之  
而漢畫則未有能得之者及得此圖所畫龍鹿承露  
人嘉禾連理之木然後漢畫始見於今又皆出於石  
刻可知其非偽也漢武帝元鼎六年以汧隴西南樓  
於巴蜀爲武都郡及其後始分而爲興州爲成州成  
州則武都之上祿也邠閣立於建寧五年翕治嶠嶽  
西狹輒閣之道有益於人而史不傳則頌之作所以  
備史之闕是則傳之亦不可以不廣也  
古今法書苑卷之五十八

